

每週經課朗誦經文(巴克禮台語漢字)2012/11/18

共同經課 - 1

撒母耳記上一章四節~二十節

4 以利加拿獻祭的日，分祭肉互伊的某毗尼拿及伊的子查某子；5 總是分互哈拿的是雙份，因為伊疼哈拿。若是耶和華關密伊的胎。6 及伊做對頭的毗尼拿大大激伊，欲互伊憂悶，因為耶和華關密伊的胎。7 伊上到耶和華的厝的時，以利加拿年年按呢行；毗尼拿猶原激伊，伊就啼哭續毋食。8 伊的丈夫以利加拿給伊講：「哈拿啊，你啥事啼哭，啥事毋食，啥事心憂悶啊？我對佇你豈無比十個子卡好嗎？」9 in 佇示羅飲食了後，哈拿就起來。祭司以利佇耶和華殿的門豎邊，坐佇伊的位。10 哈拿的心內憂苦，祈禱耶和華，來大啼哭，11 下願講：「萬軍的耶和華啊，你若果然垂落看顧你的女婢的艱難，閣數念我無袂記得你的女婢，賞賜你的女婢生查甫子，我欲互伊歸佇耶和華到一世人，剃頭刀無到伊的頭殼。」12 哈拿佇耶和華的面前直直祈禱的時，以利注目看伊的嘴。（13 今哈拿心內靜靜求，只有嘴唇振動，無聽見聲，所以以利掠做伊是酒醉。）14 以利給伊講：「你欲醉到底時啊？你毋通閣飲酒。」15 哈拿應講：「我的主啊，毋是按呢。我是心內憂苦的婦仁人，薄酒厚酒我攏無飲，獨獨佇耶和華的面前吐出心情。16 莫得掠你的女婢做歹德行的婦女。因為我到今對我的大憂悶，受激氣來講。」17 以利應伊講：「你通平安倒去。願以色列的上帝允准你所對伊求的！」18 哈拿講：「願你的女婢得著恩佇你的面前。」婦仁人就倒去來飲食，就無閣再帶憂容。19 隔日，in 早早起來，佇耶和華的面前敬拜，就倒去拉瑪。到伊的家，以利加拿及某哈拿同房，耶和華數念哈拿，20 哈拿就懷孕。到時，就生一個子，給伊號名叫撒母耳，講：「這是我對耶和華求的。」

共同經課 - 2

詩篇一百一十三篇

1 恁著謳啾耶和華！耶和華的奴僕啊，恁著謳啾，謳啾耶和華的名！2 願耶和華的名受謳啾，對此時到永遠！3 對日出到日落的所在，耶和華的名是應該謳啾者！4 耶和華搬(pôa)過攏總的國；伊的榮光卡高佇諸個天。5 是誰親像耶和華——咱的上帝啊？伊坐佇至高的所在者，6 伊家已謙卑，觀看天頂地下的代誌。7 伊對塵埃舉起喪鄉人，對糞埕堆提拔欠缺的人，8 互伊及貴族相及坐，就是及本國的貴族相及坐。9 伊互袂生育的婦仁人料理家，做多多子的老母來歡喜。恁著謳啾耶和華！

共同經課 - 3

希伯來書十章十一節~十四節、十九節~二十五節

11 閣見若祭司逐日倚啲來服事，杳杳獻許個相同的祭，就是永永袂會除去罪的。12 獨獨基督既然獻一個祭到佇永遠，就坐佇上帝的大旁。13 以後，聽候伊諸個對敵下做伊的腳踏椅。14 因為伊用一擺獻祭，互諸個成聖的人永遠做完全。19 所以兄弟啊，咱佇耶穌的血既然得著好膽入聖所，20 對伊所給咱開新及活的路，按帳簾經過的，此個帳簾就是伊的身體。21 閣既然有大祭司治理上帝的家，22 咱著用真實的心，充滿的信，心已經受灑免互良心責備，身軀亦已經受清水洗，來親近上帝；23 咱所向望的已經有承認，今著堅固此個，承認無搖動，因為彼個應允咱的是信實。24 閣著大家相眷顧，來激起仁愛，及行好。25 毋通放息恁的聚會，親像有人慣勢按呢，就是著相勸勉，既然看見彼日近，閣卡著按呢。

共同經課 - 4

馬可福音十三章一節~八節

1 耶穌出殿的時，有一個學生給伊講：「先生，你看咧，此號石！此號厝宅！」2 耶穌給伊講：「你看諸個大厝嗎？佇遮欲無一塊石留佇石的頂面，也無掉落去。」3 耶穌佇橄欖山坐佇殿的對面。彼得、雅各、約翰，及安得烈暗靜問伊講：4 「請給阮講，甚麼時有諸個事？閣諸個事欲成的時有甚麼兆頭啊？」5 耶穌才給in講：「恁著謹慎，莫得互人迷惑。6 欲有多多人託我的名來，講：『我就是基督』，來迷惑多多人。7 閣恁聽見交戰及交戰的風聲的時，莫得驚。因為諸個事的確有，總是末期猶未到。8 因為百姓欲起來攻擊百姓，國也欲攻擊國；逐所在欲有地動，也欲有飢荒。諸個事就是苦痛的起頭。」